

康云
又
士
耳
先生
又
榮
又
正

黃山先生集

庚午秋

伯夏自識



周序

予以丁卯來廈門大學時集美國專全班四十三人初移校附課班中以溫生樹校年最少而勤學尤篤三年之中每期課最皆進步至銳閩南人以方音之故審音較艱而生能於縱橫排纂中不失累黍其爲詩亦能暢所欲言洵未易才也生既卒業乃哀集平日所業詞曲乞題其端余惟生貫仙游有夾漈之風九鯉湖之勝爲拈鯉湖漁歌目之生詞雖學周吳實於稼軒爲近詞家宗派旣明架格已具此後愈當積學以充其才之所至生行矣從此以身涉世一切升沈離合皆當於此中驗之並以詞爲娛魂悅魄之具而發其高尚優美之思庶能葆此貞素以與斯世相周旋而不

周序

二

失其正也息壤在此勿忽予言庚午初伏友生威遠周岸登道援父識

包序

溫子伯夏將去廈門哀集平日所業詞曲乞 威遠夫子題其端矣旣歸復搜輯其詩擇尤雅者若干首俾與詞曲共付剞劂唯詩則尙未有序之者因寓書索予言且曰吾詩非敢出以問世唯此頻年心血所鑄喜怒哀樂所發亦欲藉此以就正於愛我之師友耳嗟呼溫子之用心善矣昔陸祁孫曰君子之於學也期與一世共明之而非以爲名也今世變日亟士不悅學民不知義識者抱爲隱憂溫子獨能奮起窮阨淬厲智慧激昂慷慨自道性情而此皦白之心迹斯質之師友而無慚卽以明之一世又奚爲而不可也予與溫子相處久晦明風雨對榻聯吟相得甚歡又皆好爲

山水游探奇躋險凡海上泉石佳處莫不有予兩人之足迹焉忽忽把別人事靡恆及今追憶恍如昨日溫子之詩才思富麗清曠邁俗迹其所至實以兩當爲近抑予尤有進者士居開元天寶而爲夔州以後諸詩無病呻吟昔人所謂吾輩遭際喪亂以視少陵所處之時實有過之無不及者則宣達愁苦風刺闕失言者無罪聞者足戒庶幾溫柔敦厚之旨存焉溫子將母有意乎予執筆爲詩且十年矣而所學不進序溫子詩不能不慨然而嘆也他山之石可以攻錯溫子又將何以起予庚午中秋上杭包樹棠序

黃花集

目次

周序

包序

鷺江吟草

鯉湖漁歌

附錄

後記

黃花集 目次

黃花集 目次

鷺江吟草

起十五年春迄十九年秋

溫樹校

伯夏

守歲

露冷風寒思渺然。更深展卷短檠前。幾回欲睡還無睡。要看新年換舊年。

春雨

一道朦朧月入櫺。瀟瀟瑟瑟靜中聽。雞聲喔喔催人起。祇見茫茫水滿庭。積雨綿綿行路難。愁來獨自倚闌干。桃花落盡無人惜。薄命紅顏淚不乾。

春遊

浪跡原林日已斜。晚煙平抹一家家。鶯梭織就千條柳。燕剪裁成萬朶花。爛漫村童籠鳥雀。殷勤野叟話桑麻。旁人笑問登臨處。遙指山巔與水涯。

看花

何事堪消萬斛愁。看花信步下書樓。紅顏未解迎生客。不語低頭祇害羞。滿園春色競芳菲。越柳穿花露溼衣。蛺蝶不知孤客恨。雙雙猶傍短籬飛。

鷺江吟草

二

感事

殺氣成雲漫碧空。年來無地不沙蟲。因知鐵馬縱橫日。會見銅駝荆棘中。漆室憂時非欲嫁。長沙作賦豈緣窮。丈夫當勒燕然石。擲去毛錐樹戰功。

登高

重九登高說避災。一雙屐齒印蒼苔。金風颯颯穿林去。疑是孟嘉落帽來。

鼓嶼夜遊

歌謳共扣舷。把酒滌塵緣。山色寒沉水。潮聲怒鬪天。雄風生袖底。皓月出峯巔。赤壁東坡賦。效顰只自憐。

乘風橫渡擬飛仙。海上瀛州思渺然。雙槳盪開波底月。倩誰來補水中天。

少女大江邊

少女大江邊。冬寒不經意。忽見一葉舟。隨波逐浪至。未審誰氏子。出語相調戲。豔冶逾西施。姿容冠一時。芙蓉如卿面。楊柳如卿眉。清流盪玉腕。浣紗向水湄。少女耳聽之。心若有所思。黃金猶不動。况爾輕薄兒。遊鱗潛深壑。飛羽止高枝。漁獵終

不得。竊笑狂奴癡。紅日已西墮。歸去莫遲遲。

鴉片生

窺管餐霞萬事灰。殘燈如豆歛如雷。秋蚊三兩凌煙過。驚是鶴從雲漢來。
觀以餅投魚者作

兩朵芙蕖照水隈。奇香偏惹錦鱗開。自憐不及池中物。猶得飽嘗芳澤來。

春曉

一年無那是春天。枕暖衾溫恰好眠。日上紗窗人不覺。聲聲晴雀噪簷前。

述懷

一片寒陵山寺碑。克繩祖武分無期。破書萬卷猶嫌少。琢句三年不厭遲。毀譽任憑人
給與。窮通祇聽運推移。八叉作賦還如此。悔讀南華兩句詩。

感時

桃梗飄零寄此生。那堪烽火歲頻驚。傷心家國情何限。淚落空江弔屈平。

讀莊

鷺江吟草

四

慢云未悔讀南華。畢竟胸懷亂似麻。更惱窗前雙小雀。無端啄破一枝花。

月夜

露冷風寒夜。胸懷話向誰。眼中多少淚。祇有素娥知。

遊山

踏遍陀峯日漸西。崎嶇小徑暮煙迷。不如歸去行不得。杜宇鷓鴣斷續啼。

晝眠

殘紅滿地夏來初。日日晝眠擬宰予。舍北舍南催布穀。了無人勸我攻書。

初夏步杜工部秋興韻

怒潮滾滾咽斜暉。隄樹風來暑氣微。點點漁舟追浪去。雙雙燕子傍人飛。行雲流水心難定。沉李浮瓜願未違。晝粥斷齋嘗已慣。平生原不在輕肥。

聲聲玄鬢柳梢頭。請我蹉跎十八秋。食務頓興懷土念。聞鶉頻起去家愁。池蓮簇簇啼黃雀。雲水茫茫下白鷗。屈指駒光春又夏。于今三載滯南州。

紀遊

漫遊獨自上梯橋。風送歌聲何處簫。洗眼還神追浪艇。賞心最是插天潮。沙鷗出沒真閒散。雛燕飛鳴伴寂寥。北望家山空眷眷。白雲渺渺水迢迢。

晨興

晨興無所事。獨步廢城西。最羨關關鳥。深慚喔喔雞。疎鐘敲落月。寒露印行蹊。極目郊原外。蒼茫曙色迷。

題謝希安前輩誠神居

列座峯巒洞壑幽。峨眉劍閣可神遊。涅槃講到精微處。石不能言也點頭。昔年曾爲拆英英。勗我扶搖萬里程。日得百錢堪自養。蜀中夫子是君平。

別友

舊雨無須倒屣迎。一燈共話別離情。疎星殘月東方白。犬吠雞鳴促早行。

月影

不復太真玉鏡臺。詩書飽蠹硯生埃。素娥憐我淒涼甚。蓮步嫋嫋入戶來。

遊清水巖

鷺江吟草

六

問水尋山汗漫遊。微風習習徑通幽。陰陰綠樹鳴玄鬢。鬱鬱蒼松語白頭。愧我不夷猶不惠。任他呼馬與呼牛。果然超出紅塵外。目極仙溪萬里流。踽踽獨行下翠微。山靈頻遣棘牽衣。青青野草迷幽徑。涸涸石泉咽落暉。倦鳥暮蟬催客去。清風明月伴人歸。孤燈獨對西窗下。乘興狼毫任意揮。

夜雨滂洶偶得絕句

陋巷簞瓢意自如。無情風雨虐蝸居。衾裯溼遍尋常事。祇惜窓前數卷書。

西城聞蛙

偶然散步上西城。月色朦朧隴畝平。幾點流螢新雨後。冤魂化作怒蛙鳴。（城下爲刑場）

題畫

廣寒仙子誦紅塵。不慕繁華不厭貧。猶憶石湖居士句。自憐無術喚真真。

登金石山

青黃滿目喜新晴。舊地重遊倍有情。曉角喚回名利夢。寺鐘響徹讀書聲。

瓶花

膽瓶斜插一枝春。玉骨冰肌不染塵。百舌窗前頻責我。折花豈是惜花人。

箇人

牡丹壓倒滿庭芳。蝶使蜂媒日日忙。蜂蝶不知何處去。牡丹依舊倚紅妝。尋春蛺蝶枉癡情。食減愁添祇爲卿。比翼連枝誰斬斷。忌人最是孔方兄。愁時強賦遣愁詩。怕見橫窗連理枝。殘溜滴來皆是淚。秋蟲響處總成悲。潮迴往事已成煙。淚眼中天月正圓。怕讀放翁悲痛語。千詩不及一囊錢。早意難於蜀道行。當時願作左邱盲。因知有恨言非益。始信無緣夢不成。每過簾前未忍看。祇緣看後倍辛酸。旁人故作嘲人語。牛矢何因插牡丹。寸心欲碎人誰覺。明月方圓我獨虧。應有雅人憐獨宿。苦無佳句紀相思。親友紛譏自縛蠶。而今顧影也懷慚。柔腸寸斷君知否。若是知時我亦甘。風動紗窗一半開。偶然相見倍增哀。懷中槌襍憐阿弟。恍惚仙人送子來。十日滂洵一日晴。三秋難擬別離情。更深獨聽空階雨。疑是嚶嚶啜泣聲。

鷺江吟草

八

渡江不楫擬橫波。脂粉汚顏淡掃蛾。阿母梳梳梳又櫛。自憐人在鏡中過。
咫尺天涯苦別離。飄零身世不勝悲。詩搜枯腹燈如豆。應是穿針乞巧時。
愁懷萬種獨心知。臥看雙星入夢遲。天上一年猶一會。人間底事總分離。
水中掬月月成空。鏡裏尋花花自紅。亦喜亦悲翁失馬。人遣人得楚亡弓。
地北天南兩別離。他年重見已難期。憶從簾外匆匆過。應是香衾輾轉時。

夢中作

莫笑蝸廬寄此身。詩書滿座不憂貧。浮生竟等夢中夢。素抱當爲人上人。
七夕遇雨

團圓時少別時多。且喜今宵一渡河。織紵偶疏遭譴責。世間紅女敢停梭。
四壁蟲聲報早秋。坐看織女會牽牛。問他乞巧何曾巧。惹我添愁却怕愁。
一片愁雲滓太清。如鉤新月不曾明。經年血淚今宵灑。隱約猶聞涕泣聲。
一年相見有幾回。終夜難宣離別哀。想是天孫憎乞巧。滂沱頻遣雨師來。

夜吟

詩成却藉雨聲催。愧煞身非倚馬才。漏盡孤檠如豆小。一星螢火入窗來。

枕上偶成

那堪唧唧語蟲悽。睡眠朦朧月落西。好夢方酣誰喚覺。一番驟雨一番雞。

芙蓉

纔過僧舍又田家。回首平林日影斜。莫怪芙蓉橫水面。紅顏原喜對菱花。

離家

窺窓冷月夢難成。恨殺雞聲促早程。慘淡螢燈猶惜別。依依伴我到天明。

過南橋

汽笛聲聲響若雷。三三兩兩漫相催。此身莫效長流水。一自東流不復回。

仙楓車中

恍如白羽賦長征。渺渺茫茫萬里程。閉目爲防沙入目。耳邊祇有疾風聲。

過陳潼關

鷺江吟草

十

關號陳瀆尙可稽。黃沙漠漠草萋萋。當年豪氣今安在。空有鷓鴣嶺上啼。

過試劍石

一石曾將兩段分。匣中光閃退千軍。何方可借書生用。共立疆場汗馬勳。

過萬安橋

一年幾向此經過。景物無多感慨多。水鳥風帆斜日裏。長虹永臥萬安波。

過泉州城

開元寺塔不知年。突兀崢嶸可插天。記得三更然蠟燭。淚珠和墨寫雲箋。

安海旅次

朝辭故國遠遊身。暮宿泉州古岸濱。最恨窗前今夜月。他鄉偏照斷腸人。

安廈舟中

秋風又送鷺江船。萬馬奔騰擾晝眠。強起憑欄惆悵望。天連遠水水連天。

抵校

頻年書劍此飄蓬。客裏何堪聽斷鴻。風送潮聲來枕畔。却疑猶在客舟中。